

Daih miz daih aeu guh, daih miz daih dangrap. Laemxseiz raeuz daih vunz neix mbouj aeu lumj banlaux nei hwnj ciengz hoenxcienq、henhoh guekgya, hoeng youq aen nienz-daih huzndei、mbouj hoenxcienq neix gvaq ndwenngoenz, raeuz hix aeu doiq guekgya、doiq sevei、doiq beksingq miz dangrap.

Seizhaenx dwg ngoenzgvenq gouj nyied ndeu, ndit daj geh mbaw-faex ciuq daengz gwnzdieg, ngauez-faex ngauzngwdngwd. Yienznaeuz miz rumz iq baed haeuj naj, heiq ndat cix mbouj sanq saekdi. Daegbied dwg banringzgvaq, daengngoenz venj dinggyaeuj, nditndat lumj feiz ciuq daengz gyoengqvunz gwnzdieg, hagseng cuengqhag dauqranz、vunz byaij roen ngamq roengzban lumj duzmoed ndaw rekndat nei, ngaem gyauej dwk、yungh fwngz dangj ndit gaenjing byaij baenaj; danci、dienhdanci gwnzroen hix lumj duzbyanouq ndaw raemxgoenj, youq gwnzroen baebae dauqdaug, mbouj nyienh youq lajndit lai saekdi.

Ndaw gyoengq vunz gaenjing

Youq Baihlaj Ndit De

在那阳光底下

byaij neix, hix miz gou. Gou caeuj haujlai hagseng youq gwnzroen doxlumj, ngaem gyauej dwk, byaij youq laj raemhfaex, ndoj ndit haenq. Couh youq seizneix, gou dingqnyi raq sing “bibi baba” ndeu, hoeng mbouj haeujrwz. Gvaq yaep ndeu, byaij dwk byaij dwk, doengzhag baihnaj dingz roengzdaeuj lo, gou ngaem gyauej ndoj ndit, yawj raemhfaex lajdin ndwi, mbouj haeujrwz cingzgvang baihnaj, cadi couh caeuj de doxbungq. Byaij daengz baihnaj de, gou nyex gyauej yawjyawj de, raen de ndwn youq baihnaj sienqmaxraiz, yawj gvaz yawj swix, raen gvaz swix cungj mbouj miz ci hai gvaqdaeuj, couh buet coh roen iq baihnaj. Gou naemj baihnaj mbouj

miz raemhfaex, de yaek gvaqbae guh maz. Cij raen de byaij daengz baihnaj le, youh coh baihnaj buet song yamq cij dingz roengzdaeuj. Gou daengx da yawj, baihnaj de miz hangz danci caezyiengj ndeu laemx youq gwnzdieg. De haeuj gyawj aen danci caezyiengj, gaeuz hwet roengzdaeuj, fwngz gaem gyauej ci, fwngz gaem diegnaengh, fuz aen ci hwnjdaeuj, caiq coq gaci roengzdaeuj. Yienzhaeuh bae fuz aen wnq, gaeuz hwet baez moq fuz aen ci hwnjdaeuj.

Seizneix boux hagseng ndeu gvaq roen, raen de fuz danci caezyiengj hwnjdaeuj, hix caeuj de doxcaez fuz. Gou yawjyawj gyoengqde, hix bae caeufaeuh. Yaep ndeu, dou couh

dawz danci caezyiengj laemx gwnzdieg fuz hwnjdaeuj liux, dangq boux dangq bae.

Neix dwg gienh saeh iq yawj mbouj hwnjda ndeu, ndaw ndwenngoenz raeuz ciengzseiz miz haujlai saeh iq baenzneix, danghnaeuz mbouj bae guh hix mbouj yingyangj raeuz, hoeng raeuz guh le couh ndaej fuengbienh haujlai vunz, neix hix dwg gij dangrap daih raeuz.

(Nanzningz Si Denhdauz Saed-niemh Hagdangz Dunghgoz Yaugih Cungh Gyahmingz)

Daxboh Nyaenma Ak Lai

了不起的狐狸爸爸

bouxraiz Lozwjdwz·Dazwj bouxhoiz Cwz Fanghdingz

罗尔德·达尔 著 翟芳婷 译

(ciep geizgonq)

9 Nyaenma Sienseng Miz Aen Giva Ndeu

Cungj guhcaemz giendingh souj neix laebdaeb daengz sam ngoenz sam hwnz.

“Nyaenma mbouj gwn haeux mbouj gwn raemx, lix ndaej geijlai nanz?” Bozgizwh youq ngoenz daihsam cam.

“Seizneix mbouj yungh geijlai seizgan lo,” Bijwnh doiq de naeuz, “de gig vaiq couh yaek iek dwk deuz okdaeuj. De haengdingh yaek okdaeuj.”

Bijwnh gangj ndaej deng, gyoengq nyaenma ndaw deihgoengq lajdieg cingqcaen yaek menhmenh iek dai lo.

“Danghnaeuz raeuz ndaej gwn saek gaemz raemx couh ndei lo.” Duz nyaenma lwg ndeu naeuz, “daxboh, mwngz guh saekdi gijmaz mbouj ndaej ha?”

“Daxboh, raeuz haenq bongh okbae mbat ndeu ndaej mbouj ndaej? Baenzde raeuz lij miz di gihvei ndeu, mbouj dwg ha?”

“Gaenbonj mbouj miz gihvei,” nyaenma sienseng yiemzsuk naeuz, “gou guhlawz cungj mbouj hawj sou hwnj baihgwnz bae najdoiq gij cungq haenx. Gou cingznyienh hawj sou youq gizneix bingzdingh dai bae.”

Nyaenma sienseng gaenq haujlai nanz mbouj gangjvah lo. De song da laep maenhmaenh bae, maeuq youq gizhaenx mbouj doengh saekdi, caiqlij dingq mbouj ndaej nyi duz nyaenma wnq cingq gangj gijmaz. Maex nyaenma rox, de cingq roengzrengz siengj banhfap okbae. Seizneix, youq mwh de yawj de, de raen aen ndang de doengh di ndeu lo, menhmenh ndwn hwnj. De yawjyawj maex baih-laeng bonjfaenh, lwgda myab ok di rongh faengz ndeu.

“Baenzlawz ne, bouxgvan ndei gou?” Maex nyaenma sikhaek cam naeuz.

“Gou ngamqngamq siengj ok di banhfap ndeu.” Nyaenma sienseng siujsim naeuz.

“Gijmaz?” Gyoengq lwg de hemq naeuz, “daxboh, gijmaz banhfap?”

“Gangj vaiqdi!” Maex nyaenma naeuz, “vaiq lwnh dou!”

“W……” Nyaenma sienseng gangj naeuz, liuxle couh dingz roengzdaeuj danq gaemz heiq ndeu, naj saepsaeng ngauzngauz gyauej. De youh maeuq roengzdaeuj. “Aen banhfap haenx mbouj ndei,” de naeuz, “haenx dauqdae guh mbouj baenz.”

“Vihmaz mbouj baenz, daxboh?”

“Aenvih haenx couh dwg naeuz raeuz lij aeu laebdaeb vat cong, hoeng raeuz gaenq sam ngoenz sam hwnz mbouj gwn doxgaiq lo, bouxlawz goj mbouj miz rengz laebdaeb guh roengzbae lo.”

“Dou guh ndaej, daxboh!” Gyoengq nyaenma lwg hemq diuq hwnjdaeuj, gvaq baihnaj daxboh gyoengqde bae, “dou guh ndaej! Dou guh ndaej mbouj ndaej, mwngz couh yawjyawj lo! Mwngz goj guh ndaej!”

Nyaenma sienseng yawjyawj seiq duz nyaenma lwg, riu lo. De gag siengj, gyoengq lwg gou ndei lai lo! Gyoengqde iek yaek dai lo, sam ngoenz daeuj gyoengqde gaemz raemx ndeu cungj mbouj ndaej gwn, hoeng gyoengqde lij caengz duix roengzdaeuj. Gou itdingh mbouj ndaej hawj gyoengqde doeknaiq. “Gou……Gou siengj raeuz aiq sawqsawq ndaej.” De naeuz.

“Vaiq gangj lovei, daxboh! Gangjgangj mwngz siengj hawj dou guh gijmaz.”

Maex nyaenma menhmenh ndwn hwnj. Aenvih mbouj gwn doxgaiq mbouj gwn raemx, de youh coj-gvaq gyoengqde moix duz. Ndag de nyieg raixcaix. “Gou doiq mbouj hwnj sou lai lo,” de naeuz, “hoeng gou siengj gou lij bang ndaej saekdi.”

“Mwngz couh youq gizneix caj, maex ndei gou,” nyaenma sienseng naeuz, “dou gag guh ndaej lo.”

Insik Seizneix Ndeindei Bae Hag

珍惜当下 好好学习

Yawj liux vagi 《Lwngyezrauh Vangz Danenz》, gou roxyiuj le gij saehsaed Vangz Danenz daj iq laeb cei qheiq hung, vih saedyienh lijsiengj, lauxlaux saedsaed, baenz yamq baenz yamq bae hag.

Vangz Danenz daj iq couh miz lijsiengj hung, de naemj bae dicizdui guhhong, lumj daxboh nei vih guekgya caeuj sevei okrengz. Yienghneix, de roengzrengz rox saw rox sa. Miz baez ndeu, Vangz Danenz caeuj geij boux doengzhag byonghhwnz laeglemx buet bae funghsaedniemh guh saedniemh, doeklaeng deng bouxhendou Moz daxgoeng yawjraen, mwh buet deuz lij dwk byoengq gicaiz ndaw funghsaedniemh. Doeklaeng deng lauxsae roxyiuj le, lauxsae mboujdan mbouj naeuz gyoengqde, lij haenh gyoengqde gyaez hag dem, lwnh gij gojgaeq Nozbeiwj vih yenzgiu ywbauq haenq, saedniemh saetbaih cien fanh baez hawj gyoengqde dingq. Gvaqlaeng lauxsae lij bang gyoengqde boiz gij saedniemh gicaiz deng dwk byoengq haenx.

Ngoenzneix, raeuz ndaej youq aen nienz-daih huzndei mbouj hoenxcienq neix gvaq ndwenngoenz, liz mbouj ndaej gyoengq banlaux dwgrengz buekguh、mbouj goq dailix. Neix hawj gou naemj daengz gij vehmienh denyingj 《Cangzcinhuz》, doenghgij cansw ciyenginh vih bang Cauzsenj hoenx Meijgoz、henhoh guekgya mwh giepnoix doxgaiq lij giensouj cindi, hwnzngoenz mbouj doengh bamq youq diegnae, mizmbangj cansw youq ndaejhingz gaxgonq deng nit dai, gyoengqde yungh lwed caeuj ndangnoh vuenh daeuj aen Cungguek moq huzndei.

Gyoengq doengzhag, raeuz aeu insik seizneix, ndeindei bae hag, majhung guh boux vunz doiq guekcoj、doiq sevei mizyungh ndeu.

(Baksaek Si Yougyangh Gih Cunghvaz Siujyoz Cinz Suhcinz)